

摘藻堂四庫全書薈要

集部

欽定四庫全書薈要

聖祖仁皇帝御製文第四集卷二十五目錄

雜著

七詢

欽定四庫全書

卷二十五目錄

欽定四庫全書薈要卷一萬三千一百六十三

集部

聖祖仁皇帝御製文第四集卷二十五

雜著

七詢

體元主人膺期運撫寰海紀星次者垂七十年臨雲陞
者周六十載常以薰風應律梅雨戒塗駐蹕興州之域
棲神無暑之區追疇昔感居諸意怫鬱乎其不舒也自
冲歲承基弱齡親政敬天明威察民視聽夙寤晨興慮

慚前聖更歷多艱無忘執競有若三藩叛命尾大必芟
氛連海嶠烽起西南遜熊虎鉏豺豸驅以雷掃以電神
弧彎而天狼落枉矢飛而妖鳥散覩六幕之塵清費八
年之廟筭黃淮并溢決岼潰茭波漂百室道阻千艘翠
華頻省撓樺周遭然後息桃花之怒浪平竹箭之驚濤
人歸廬井帆接亭臯安知候之寒暑而躬之焦勞也西
戎跳踉窺我藩籬張皇王師陵厲禁旅再歲三征雲屯
飈舉越瀚海度磧鹵忘渴飢均甘苦夫乃馘冒頓服侯

獬紫鷺徐入朱鷺凱還雖守成而述事等締造之艱難
也至於戶口繁滋裨瀛表裏地震天灾習聞前史豈有
遐遺痼瘵在己晝膳弗甘宵眠屢起恩不踰晷澤必下
行祥羊靡數鴻鴈輟鳴民咸安其居而後釋然於中情
也躬不遑息心不自逸於茲五紀常如一日內則畏天
閔人勤身恤物外則沐雨櫛風衝霜犯雪擾靈府損精
和榮衛結轡神氣消磨年芳冉冉星髮皤皤勞稍涉而
輒倦步方跬而慮蹉思每短於再審事旋忘於既過來

日不可期去日已苦多矢乾乾以時行恐菁華之莫繼
彼曦輪之既中異東隅之初麗將息意而燕游凜鴻業
之攸繫誠一簣之功虧寧始勤而終替疲形竭智永思
長吟歷年久而慮愈遠閱事多而憂彌深冀家給而人
足財未阜於虞琴語風移與俗易化未致夫儀禽慕視
履之元吉知上佑之難謀其何以寬無窮之煩念發垂
老之歡心於是左右侍臣文武有位二氏緇黃九流方
伎奔走輦下負曝獻暄願言舒志錫福元元主人乃博

采不遺從容顧問俾無忌諱各攄厥蘊

近侍之臣進曰竊聞帝王之為樂也秘苑閒宮遊宴有
所班輸是營千門萬戶閣通往來樓迷去住亭名臨月
臺稱黏雨黃金作屋玳瑁為梁文櫨繡拱漆瓦雕牆間
以沉檀飾以璿璫曉日照而後庭流影微風起而數里
聞香則有夏宮妹喜殷室有蘇異扇搖其丹鵲嬖人獻
於赤烏龍聲褒艷驪戎晉妹修明辭越夷光貢吳咸姬
偏寵邢尹並都協律女弟謳者子夫帳中妝若月之蛤

枕前分不夜之珠機絕巧工鍼神善製蟬飛薄鬢星燐
高髻思香競媚點膏逾麗羊車戀竹葉之扉馬射簇芙
蓉之騎舍利穆婢小憐馮家蓮上玉兒桂邊麗華長蛾
顰果憨女司花太真之鮮葩解語宵孃之新月乍斜莫
不秀發穠姿橫生逸態顧影有雙當時無對別有班姑
婕妤左妹修儀蘭英獻賦上官評詩采蘋樂府花藥宮
詞咸摘華以待詔或稱美於占辭爾其熊毛席綠象牙
簾白時窺綺牕遙映紅壁鈿綴金蟲釧裁琥珀袍飛瓊

以流翠裛纖綃而染碧時則蘭苕纔露梧樹未霜紛瑤
臺之窈窕度鈿砌以徜徉喜方隅之晏清感節序之迴
換貴人生之行樂及良時而酣醺爰有龍膏始釀馬乳
初來翠濤百榼紫霞千杯麒麟膺髓猩脣豹胎雲鷄澤
鵲淵鱗江鯁錯窮四海珍貢九垓蓐收動桂勾芒調梅
於是衆伎俱陳八音齊舉笙鳴鳳翼箏移鴈柱鄧琅折
柳之笛朋肯催花之鼓簞篋則桃皮含商琵琶則檀槽
促羽雜沓繁會激揚清謳新翻水調唱徹涼州韻細而

脣朱微粲聲淒而眉黛暗愁隨紅牙之緩緩協赤玉之
悠悠彩雲仙隊素霓舞列長袖吸華輕裾迴雪釵潛搖
以逐步珮徐鏘而應節翩鸞影以遙瞻希龍顏之豫悅
及乎銀缸既爛銅漏猶遲惜餘歡之晼晚顧綵筆之葳
蕤授簡尚宮歌以繫之歌曰拂巾接槃曲既揚妖姬素
面華月光上為袞幃衛風霜下為履綦願同行日車永
永駐扶桑千秋萬歲樂未央若此乎徵新聲選麗色蕩
樂娛心不知所極今主人乃欽欽翼翼勤而不息富有

萬國而寸陰是惜泊然無以為歡臞然類於山澤盍糴
萬務擷衆芳暫取以為消憂之術怡神之方乎主人曰
昔嘗覽乎沫水故墟驪山荒殿姑蘇之臺瓊花之觀金
粉埃塵喟焉長歎階厲召旤敗德累名宜鑑傾城之轍
毋招伐性之兵年之少也不留聰明今垂七十矣寧復
溺志於色聲

文學之臣進曰清明在躬聲色不邇惟聖右文請陳皇
始龍馬示象庖犧作圖繫辭翫翼三古同符邵演希夷

程刊輔嗣朱集厥成推本占筮事濟民用理洩天秘百
篇羸燼及漢稍傳濟南則屬讀詰屈闕里則科斗聯螭
照乘猶遺連城斯得執簡皆聖人之徒嘉言實王者之
式齊韓豎魯各以詩名毛受子夏鄭繼其聲序由衛宏
疏緣劉焯自西晉以孤行至南宋而啟鑰春秋五家鄒
夾無聞公穀口說左據舊文洛閩未遑張胡齊轡莫叅
筆削之功誰炳衮鉞之義郁郁周禮制自元公書成定
鼎官補考工儀禮為經禮記為傳河間之逸者已多小

戴之存者未半至若史家之體祖於典謨編年記事左
氏遺模遷承談基固纂彪業振古流芳將來取法范刪
衆籍陳紀三方漢之仲季何其焯煌晉書天文淳風妙
解沈約詞人宋志博采伯起撰魏子顯著齊自茲厥後
僅而有稽梁陳齊周志皆無述隋書效宋五朝咸悉索
頭島夷交相詆誣延壽後出南北部區唐書新修歐宋
分庀視劉之舊最得統紀五季自鄧蕪而弗理卓哉廬
陵庶追腐史司馬通鑑甲子是編搜積卷於秘閣陳炯

戒於講筵猗綱目之大義揭義娥以高懸均左右史之
舊職續書春秋之新傳若乃南薰作歌晨露流詠池上
答白雲之謠沛鄉起大風之興憂民魚而瓠子功成喜
天馬而流沙道夏帝京十首雄氣無儔東堂三傑睿藻
偏優太和之古調清峻大中之曲宴唱酬莫不包含黼
黻敲戛琳瑯漱幾之命意同卷阿以來游至於穗啟
神農鸞徵少昊禹碑甚奇湯鼎為寶周穆紀日漢章名
草宋文規模於子敬齊高吐納夫僧虔孝建之翰墨馳

譽永明之筆力象賢梁帝觀鍾繇之意陳主品嗣真之
篇逮夫貞觀妙入羲域瞻屏風而歎草書登御牀而取
飛白睿宗則五雲紛飄明皇則八分英特是皆鴻鸞鶴
舞虎卧龍跳寄閒情於絢素絢殊采於珠韜今主人躬
上聖勤下學體太極超先覺折中四府等量百王乙夜
未嘗停於覽西山無所秘其藏爰申石渠之論載廣虎
觀之議考代葉之隆汙較簡冊之同異固理熟而神融
非玩物而喪志也聖又多能道兼衆藝體工六文詞高

五際逢風景之清暢矚川岫之澄幽拂宣毫之圓健試
剡藤之剛柔月露吟而意遠烟雲落而勢適韻金聲而
玉振象日字與奎鉤豈不興酣情逸俾彌性而優游乎
主人曰經觀大義毋為華葉史貴徵信匪誇涉獵入聖
之階梯具在臨人之鑑戒斯憑允平生之所好慮垂耄
之弗勝未免披吟亦事楮墨不爭文士之長寧謂書家
之則聊抒寫於一時何余情之可釋

介冑之臣進曰文以飾治武乃申威雕蟲之技壯夫不

為請論我國家軍容之赫赫戰功之巍巍也風后握奇
力牧為將蛇鳥連營貔貅列仗爰執星廬戈環玉帳扛
鼎誇雄翹關示壯甲冑則飾貝齒綴朱綬精皆浴鐵麗
悉縲金百疊之蛇鱗護臂重鑲之鮫鎧當心劒戟則蘭
葉凝霜蓮花舞雪龍訝津騰鯢驚水截雍狐之鍔千攢
湛盧之鋒萬列弩矢則燕山之角朔漠之蓬削夏箭規
唐弓鯨牙耀日鶉尾迎風羽橫空而蝟黑鏑捲地而塵
紅若乃驥產烏孫駒來赤水垞滿丹髦谷量綠耳六印

聯珠三花散綺駕茲白於輶轅
奏乘黃如鹿麕貢道通
戎政理芻牧攸宜蕃庶莫紀爰分錦埒並轡金羈珊瑚
之鞭霞舉玫瑰之轡星馳左御周輿右陳殷輅樊纓則
五色紛垂闔戟則重牙畢駐於時塞樹初丹沙茅盡白
彤雲籠帳殿之高素月吐邊墻之隙八校清塗九旂照
陌旆獵獵而穿林馬蕭蕭而度磧萬騎密布兩翼斜張
火明迴野角轉遙岡陣合而潮聲乍捲圍圓而虹影何
長車邊燄猛絳畔鷹蒼脰隨草偃爪挾風颺毛飄飄

其漸下足趯趯而全僵於是武士奏能烝徒雄發或拉
豹以摧斑或拳獠而磔骨晒狼顧之尾寔喜熊掙而掌
滑飲鏃而蒼鹿羣呼投畀而銀輦早蹶至若芳洲日霽
春渚冰消狩南畿之廣澌按五花於輕撓舟聯鷺鸕之
形浪蹙翼箕之勢弋必待飛繳無及細習水戰之神機
授澤虞之節制家秘珠玉之鈐士擁戈矛之銳既令一
而力齊亦恩深而忠勵且我皇朝拓宇紘極來同羅地
天之上下包日月之西東絕漠在藩籬之內荒服盡庭

廡之中蝨茲孽醜恃其遐逝蛙謂井寬螳張臂力我軍
乃經無阜歷不毛水名寒暑山號麇螯瘴烟晝密訛火
夜燒然而勇思敵愾義奮同袍度危輕於飛鳥攀險捷
於懸猱歡聲動油幕和氣逐星旄刀刺而甘泉涌旗展
而毒氛消驚從天而忽下紛穴地以潛逃俯瑤池之浩
蕩涉普陀之岌嶷渡金沙而拔幟定三危以鳴鐃是則
域絕梯航名遺圖史昔阻殊方今為同軌六師告捷萬
方送喜功高涿野化婉虞階扈征不逮殷武莫儕寧不

足以鳴億代之愷樂釋一人之憂懷乎主人曰天有雷
霆功同風雨聖作弧矢道濟千羽安不忘危訓茲貔虎
率由周禮歲有蒐苗搏犀兕以作氣冒風雪以習勞羽
林弓親率琚弓弓手操垂老弓不懈匪樂此弓遊遨感
唐宗之殪豕猶技癢而自豪何雄心之欲逞而英武之
難韜八荒在闔七德有征不得已而後用計萬全而謀
成雖屢聞於露布長戚然其靡寧固不恃太平而弛備
亦非矜遠畧而佳兵

釋氏之流進曰佛道崇虛不以威力常生歡喜之心必
在清淨之域粵自日升法界雲散梵天古來證聖今劫
當賢善慧夙願羅衛因緣夢占白象胎置金蓮徒衆則
降生百億光明則遍燭大千發念四門凝神十地脫屣
王城披緇林際安步而青雀環飛跏趺而火龍戢勢當
明星之出時應執月而度世其為道也戒行為本禪那
為趨精進何勇忍辱如愚惟一真之自在忘色相之有
無懸靈臺之澄鏡出濁水之明珠誕先登於慧岸乃永

超乎迷塗離欲塵而皓潔變苦海為懽愉其為教也大
拯羣生普濟萬有三乘可階六度是牖雷鼓揚聲霜鐘
虛受灑甘露以息心聞妙音而稽首意樹生夫善果情
田薈其害莠照暗室以芳苾擢汙池之瑞藕裨王化之
淳和躋黎元於老壽爾其騰輝周室皎像漢庭蘇由識
兆傳毅通靈天竺寫範石室緘經法顯於邁遍覺遐征
訪雞足之故跡啟鹿苑之舊局竹簡誌其周歷松枝感
其專誠則貝文自茲盛出金字於焉流行矣又有伊存

初授迦羅始輯趙地宗澄秦都禮什宣譯大藏淵思秘
笈跋陀栖蹤於少林難提摹影於洛邑此則法雨之東
被而禪風之西入也然乃律論雖著心印未承達磨遠
屆爰示真乘珈黎轉付機契斯憑北宗神秀南派慧能
花開五葉燄發千燈是皆默悟妙圓深通聖諦受如來
之法眼嗣大士之苗裔夫其超九劫而授記繼六佛而
仰瞻現白毫之功德顯紫色之莊嚴天上天下其尊無
對世出世間此道為貴是以帝釋皈依人王宗事元魏

則一萬三千所江左亦四百八十寺莫不塔規崔離宇
肖鷲峰花林藹藹蘭若叢叢須彌巍殿兜率淨宮盤承
團露鐸和高風六牙殊狀九級神功升堂則月容霄表
躡梯則人語天中亦有翦綵刻檀雕銀鏤玉香刹之金
翠二丈幡幢之珍寶百斛龍鱗敷席鳳毛隱褥薦瓊膏
而乳融焚瑤髓而烟馥現路衢之慶雲耀坊市之華燭
洵佛事其煥儼轉法輪於大覺熙萬年之鴻祚頌五位
之弗祿今主人無量壽相種大福因修成億劫弘濟兆

民隨喜法喜能仁當仁邁應聲之前迹猗感運而降神
願闡真如之教永綏極樂之身主人曰釋氏之道湛然
虛淨脫離六根明心見性無惡無善豈達性命義之不
存又安能敬順動靜以循環匪偏枯於寂定包理數其
紛羅何談空而作聖雖了徹乎三生亦奚裨於國政既
塵芥夫山河寧存心於萬姓捨身同泰迎骨鳳翔垂鑒
前史曷云其臧敬而遠之聖言孔彰

道家之流進曰釋開覺路老合儒宗直窺玄奧大啟仙

蹤原夫有物混成冥冥窈窈先天地生字之曰道陰陽
互根坎離相抱本氣祖於太虛蘊谷神之至寶絳宮燭
娘玉房逶迤木公金母姹女嬰兒龍虎森列昂畢交馳
神資凜雪妙合希夷維導引法為養生主樞動不靈水
流曷腐揺天柱擊天鼓熊經鵠息猿攀鳥舞戲五禽而
榮昌祛三蟲而輕舉六齋清淨十戒精嚴玄關自扃尺
宅長緘澄空鏡皎活水波恬戕身之斧固觸爽口之味
奚沾心欲葆真鼻先視白息由意調氣緣思積抱一兮

探珠守中兮拱壁存想而橐籥開內照而津梁闢爾乃
納新吐故吞景含光絪縕太始呼吸元陽丹田鬱鬱烝
海泱泱紫霧騰於上谷黃芽茁於中央迺有華池旁流
璇露寶液潏洄瓊漿布濩六府潛䟽百骸畢注汲醴井
而難枯灌靈根而永固若乃九三列鼎六一和沙烟浮
金竈乳吐瑤葩刀圭散雪鉛汞蒸霞充糧而煮白石擲
米而成丹砂別有冰園之瓜玉文之棗淪朮同調茹芝
共擣錢鏗啜桂以緜齡務光哺薤而壽考偃佺食松而

飛行南岳采苓而助姣王興換骨於菖蒲鳳網咀華於
卉草餌八石而方瞳服一丸而紫腦所以至人禀二氣
運三真按七候具五因保戊己守庚申朝喻鬱儀夕采
結璘內則九還毓性外則寸匕回春煉形為氣化氣成
神烈焰莫灼弱水難淪金玉其色日月為身綠毛不槁
頰頰長新則有赤松雨師崆峒親訪作歌黃竹授書河
上笙吹緱嶺袖挹浮丘竇令乘龍而上下琴高控鯉以
遨遊時而矯舉層霄遙征瀛海眺員嶠之峻增憇方壺

之奩塏九色之鴻蹕蹕三素之雲霞黠霓旌荏苒以排
烟螭衣陸離而絢彩芝童導舞桂女擎觴雉羹箸臙麟
脯盤香鶴奏延年之曲鸞吟益壽之章揮三千之琅簡
騁十二之文凰縣圃之景光自愛蕊宮之娛樂偏長今
主人體乾元握太乙凝剛健之精造沖虛之室簡幾務
之焦勞導尊皇躬以寧謐元始道合澹穆無為養一心之
和暢致八極於雍熙固性命之真樂仁壽之良基不得
謂太上道妙與聖治而兩岐也主人曰道法自然為天

地根老氏之學能養其真流而成弊刑名放蕩長生久
視語益惆恍况神仙之杳渺氣歷劫而難聚縱白日兮
飛昇與世道乎奚補慨秦漢之往事求方藥而何愚用
清淨而獲效寧化美於皇初養身壽人儒者有道保合
太和何取黃老

醫術之臣進曰衆家紛綸各有所宜導和釋結常守惟
醫雖方技之小道誠親切而神奇自古炎農始宣藥品
形色必區性味攸審亦越軒轅繼作內經運氣惟叙部

候聿明岐彭扁俞振揚輔導君臣佐使之相須神聖工巧之畢到勒諸玉版典在靈蘭遭羸禁而無恙媿義易而永傳爾乃驚驚鳴岐姬公制禮職領天官務寧王體調和食飲滋息本根精神欲其內守政事先乎理身左氏作傳載秦和之診視馬遷述史序倉公之證治備演鴻術兼表奇事嗣是長沙賢守垂金匱之要句漏仙令集玉函之妙華陽別錄太白千金遞相授學不輟披尋猶復從壺中之幽叟搜肘後之秘藏門帶杏林而霏雪

宅留橘井而浮香三世之名著十全之實彰以臣愚管
仰揣聖躬非有陰陽勝負侵其外喜怒嗜慾伐其中特
以懷萬古之永圖鍾四表之遙情憂慮太遠則費神智
計過周則耗精默識成性偶難憶於忽遺通微必睿時
不屬於思維得上藥以為助自壯盛而不衰西土浮陽
作甘美草式和羣品首資國老瑤光散彩人獲具形恒
騰紫氣亦聞呼聲彤繇上布皓苓下生松腴不朽伏菟
通靈苗名小草本為遠志醒心是賴出處非異堯韭天

降昌陽引年百陰感氣九節蟠根隰產惟芊地髓凝黃
從下會意沉者尤良令應金縢族辨苦蕒齡延妙用露
裛佳色諸蕕修脆月盤煮糜生則膩滑乾收乃宜龍眼
繁實粲若驪珠蜜脾無滓益智有餘斯皆可以開心安
神填精輔志久服輕身近驗強記他若忘憂樹之丹棘
合歡贈以青棠猶以力微效淺未敢貢於尚方也至於
筋力小勩血氣異候樂不疲而覺強足容重而嫌後固
無事於按蹻更靡假於鍼灸藥冬蔓茂經驗紫微日行

三百有過鵞飛天精地骨枸杞還壯吠虬隱叢仙人作
杖交藤如斗山翁成瑞髮重鬢黑步逾便利伊仙靈眦
輔足最神柳詩所歌不越盈旬穗象郝蟬性著逐馬丹
參曾試蕭炳非假以之湯液去患若風之吹雲醪醴取
益若寒之回春凡臣所陳氣擇其平味簡其良品無迂
僻用必經常屏金石之多悍捨蟲獸之微毒先嘗奚待
乎九折奏御方迺乎百福煩悃渙釋動作輕安加由繹
而思彌永循端末而記益全襟舒兮懷暢色澤兮體胖

何必高居深念鬱悒心顏乎主人曰古帝垂經以原其
本良師立方以使之平能回氣化有裨生生止祛疾疢
匪駐年齡食惟穀味滋以薑桂若服藥之過多反五藏
之為累況乎出產殊地採造愆期質同效異物是時非
試不獲應久愈失宜嘗探求者歷載猶影似而未真欲
綜覽以著書恐貽誤於後人思邈有達言養性先自慎
寧以憂畏為本勿惟藥用是信

於是有巖阿一老皓髯樸貌擊壤行歌韜華閱耀稽首

山莊之門上獻芻蕘之言曰諸臣所論惡足以知主人
哉昔者唐虞三代之治也堯德曰欽君道之大虞廷交
吁動色儆戒夏后克艱其政乃又成湯慄慄臨淵是慨
文王烝哉敬止不懈武受丹書戶牖銘誡謨誥雅頌歷
古相傳於赫天命明徵聖言匪四海之為富將康濟夫
黎元匪九重之為貴將仰荅夫蒼旻理庶官而無曠躬
萬幾而必勤思艱鉅之負荷雖細微而靡捐不以天下
為樂惟知為君之難今主人稽正學披往牒溯百世之

緒繁億年之業撫幅員之廣博覩民物之繁稠日方中而恐悚雨未至而綢繆譬朽索之馭馬喻洪波之載舟覽青史以申鑒紆黃屋之深籌何一夫之可勝何一事之不可憂乎乃若內外建官賢才是樹用牧閭閻用治軍賦廢耳目而任心豈英髦之可遇爰詢訪於羣僚曷由消夫黨附或顯名於卑秩逮位高而改度倘審察之未精將輕信而成誤又若蠲租賙食益下之經先時峙備廩庾宜盈本常平之良規參社倉之遺軌非綱紀之


得人徒名存而實詭及臨事而設施貴周密於條理苟
奉行之不臧竟何裨於井里法惟禁暴德在好生律令
不用道化以貞自親民之守令已莫必其得情況受讞
於槐棘憑案牘之權衡罰雖薄而求當乃克慎乎祥刑
每登中於歲杪占貫索之空澄若此者自非主人離照
不遺乾綱獨運則何以肅官方解民愠作元命申清問
百工允釐有條而不紊乎主人曰隱者之言美矣然終
奚以釋吾懷耶對曰王者之道父乾母坤嚴恭寅畏罔

間晨昏維天之怒風烈雷煇側身修行言省其愆維天之喜景星慶雲婉容愉色以承其歡視無形而若見聽無聲而如聞儼精禋於二郊通志氣於兩間命變化其靡定福不可以倖干恒跼蹐而齋慄敢戲豫以自寬代天治物綏御遐邇睠此蒼生實吾赤子彼鞠育之慈恩固疴癢其一體崇責任於元后曾何分乎毛裏縱暹隔於帝閭如號啼之在耳果誠心而求瘼斯致頌於樂只宜乎舉膳踰晷求衣待旦苦身勞形耄期忘倦卜天行

之泰否審人情之萃渙善罔小而祥基惡罔大而旤莠
履虎尾以操心涉春冰而慮患笑與嘖其不假處聞燕
而齊莊恐潛移夫威福杜窺伺之在旁治與亂其倚伏
迨明盛而思防炳幾先以遠照用鞏固夫苞桑信盈虛
之有數修人事以為常筮艱貞以无咎豈宴安之可嘗
感晚節之易改永垂警夫怠荒期初終以如一運不已
之陽剛雖齒髮之就衰尚黽勉以自強縱精力之漸耗
詎惕厲之可忘是則主人之憂勤也天高地下與之偕

極日往月來周而無息舉天下之人莫可與分其責而
又何術以自歡何時之能釋主人曰隱者之言實獲我
心有志未逮我思益深夙披誦夫尚書攬帝王之金鏡
所其無逸裕大猷以立政又觀玩夫周易綜微言
聖能恐懼以致福茲得中而履正殷憂勞勩習與
性成學於古訓不敢荒寧前途之計後世之寄疇勤疇
恤繫余是視兢兢業業不知老之將至

聖祖仁皇帝御製文第四集卷二十五



總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書薈要

集部

聖祖仁皇帝御製文四集卷二十八

六至



詳校官原任編修臣徐立綱

欽定四庫全書薈要

聖祖仁皇帝御製文第四集卷二十六目錄

雜著

康熙幾暇格物編

星宿海

蒙氣

方音

窩集



鳥鼠同穴

白粟米

使鹿使犬

哈密引雪山水灌田

穀穗變蚊

土伯特

石鹽

冰厚數尺

察哈延山

南無字義

達發哈魚

地絕處

南方物性

山海關

哈密瓜

三門砥柱

雷聲不過百里

海魚化麀

石魚

山氣

秦達罕

欽定四庫全書薈要卷一萬三千一百六十四

集部

聖祖仁皇帝御製文第四集卷二十六

雜著

康熙幾暇格物編

星宿海

黃河發源星宿海後人以星宿之名疑黃河從天上來
非也朕嘗遣侍衛西窮河源至星宿海蒙古名鄂敦他
臘鄂敦即星地他臘即野上飛泉雜湧成水泡千百從高下望大

小圓點燦如列星故名星宿耳朕親征厄魯特時於寧
夏回鑾出橫城口自船站登舟順河而下至湖灘河所
二十一日皆前人未施舟楫之地波流起漸水色黃濁
日光摩盪燦爛如鎔金船中上下人員無不目眩也

蒙氣

蒙氣離地甚近四十度以上即不用蒙氣表矣故地方
高朗清處皆無蒙氣近有測量地里圖人早行晨雞未
發忽見天際如日方升林木村舍依稀辨色須臾昏黑

如故移時東方始明蓋日在地平之下光暎蒙氣而浮上也正如置錢碗底遠視若無及盛滿水時則錢隨水光而顯見矣

方音

朕巡歷七省土俗民風皆留心體察凡各省分界處其土人語音即異如直隸各府所屬聲口間有不同而亦不甚相遠若一入德州界便是山東語音一入固關界便是山西語音以至江浙無不如此蓋分隸各省故也

蒙古部落雖多其語言總無大異以咸在郭畢也

郭畢即瀚

海其地多砂石少草木

至其地者一見而知其為郭畢猶至窩集

者一見而知其為窩集也

窩集者密樹叢林冬夏不見天日

窩集

窩集東至海邊接連烏喇黑龍江一帶西至俄羅斯或寬或窄叢林密樹鱗次櫛比陽景罕曜如松栢及各種大樹皆以類相從不雜他木林中落葉常積數尺許泉水雨水至此皆不能流盡為泥濘人行甚難其地有熊

及野豕貂鼠黑白灰鼠等物皆資松子橡栗以為食又
產人參及各種藥料人多有不能辨識者與南方湖南
四川相類

鳥鼠同穴

天地之大奇異甚多經典所載必有證據後人因未親
知實見故疑而弗信如禹貢導渭自鳥鼠同穴孔安國
傳云鳥鼠共為雌雄同穴而處蔡沈謂其說怪誕不經
此特蔡沈未嘗身至其地耳張鵬翮奉命往俄羅斯經

過地方見鳥鼠同穴事朕曾面詢之知禹貢之言不誣

白粟米

粟米

本草粟米即小米

有黃白二種黃者有粘有不粘本草注

云粟粘者為秠北人謂為黃米是也惟白粟則性皆不粘七年前烏喇地方樹孔中忽生白粟一科土人以其子播獲生生不已遂盈畝頃味皆甘美性復柔和有以此粟來獻者朕命布植於山莊之內莖幹葉穗較他種倍大熟亦先時作為糕餌潔白如糯稻而細膩香滑殆

過之想上古之各種嘉穀或先無而後有者槩如此可補農書所未有也

使鹿使犬

赫真飛雅喀鄂羅春其稜四種地方在東北海邊其人
不事樹藝惟以魚為食以魚皮為衣其地不產牛馬家
畜赫真飛雅喀使犬鄂羅春其稜使鹿以供負載皆馴
熟聽人驅策往日歸化者甚衆前歲遣人至彼又有無
數野人投順其土俗約略相同也

哈密引雪山水灌田

哈密地方終歲不雨間有微雨沾土即止亦無霧露惟冬月有雪而每年庄田豐熟無旱乾之慮者以引雪山之水大者為渠小者為溝足資灌溉非如內地必仰藉雨澤也又其地多暑往歲有回子二百餘人朕因噶爾旦事發令居杭州常念水土不同恐其不能耐熱及回京時無一人疾病詢之云哈密土魯番之熱更甚於杭州但土地高燥有凉水可以解暑杭州至三伏時則井

泉河水皆溫不能解炎暑耳

穀穗變蚊

策妄阿喇布坦地方多種水田頗無旱潦之患惟或一年穀穗變蚊而飛撚視之為水或為血朕曾遣侍衛到彼親見其事嘗閱嶺南異物志云嶺表有樹結實如枇杷每熟即拆裂蚊子羣飛土人謂之蚊子樹此與穀穗變蚊之事相類程子曰天下之物必有對即此可見矣

土伯特

今之土伯特地方想即唐之回紇也德宗時嘗以公主妻之至今其地尚有下嫁時物以此考之知為回紇舊地無疑

石鹽

石鹽產於回子地方每高山罅隙處多有之嶮峻不能至土人多用箭射取之色潔白明朗略似水晶性溫入火不爆者乃真可以療病與中土之鹽迥異又有紅色石鹽產於平地水澤中色微紅可愛土人飲食用此不

聞入藥也

冰厚數尺

漢書有云積陰之處木皮三寸冰厚六尺後人未必深信不知近北極之地冰雪經冬夏不消結冰有至數尺厚者即今黑龍江以北皆是如此古人之言不為無因亦地土嚴寒之所使耳

察哈延山

黑龍江西有山名察哈延穴竅中白晝則吐燄晚則出

火經年不熄近嗅之氣味如煤其灰燼黃白色如牛馬矢撚之即碎亦內地所未聞也

南無字義

佛經南無二字世人不知西域音義妄以私見穿鑿注解疊帙盈篇究無一語歸著朕嘗問西土人知彼中以合掌稽首為南無音讀如那摩故經典凡諸佛號皆有南無二字蓋云稽首某佛也此說最簡當因思每見宋元人東帖其致僧家者題紙尾云弟子某和南和南為

頓首猶南無為稽首也

達發哈魚

達發哈魚黑龍江寧古塔諸處皆有之每秋間從海而
來銜尾前進不知旋退充積河渠莫可勝計土人竟有
履魚背而渡者

地絕處

黑龍江以北地方日落後亦不甚暗個半時日即出蓋
地之圓可知也近北極太陽與地平週掩無多也朱子

云唐太宗收至骨利幹置都督府其地夜易曉夜亦不甚暗蓋地當絕處日影所射也又云通鑑說有人適外國夜熟一羊胛而天明此是地平之處日入地下而此處無所遮蔽故常光明以此知古人紀載皆有確據非好為新奇之說也

南方物性

南方梅杏桃李之類開花結實皆早於北方及至果熟或與北方同時或且有後時者其麥苗二月即已繁茂

吐穗亦早宜乎成熟先於北方及較其收穫之期南北
究無大異即如野草初春雖已長成而結子必待秋令
總之南方風土柔緩物性亦復相似故米麵果實之屬
食之常難運化朕屢次南巡親加體驗乃知之甚詳彼
土著者皆習而不察也

山海關

山海關澄海樓舊所謂關城堡也直峙海澨城根皆以
鐵釜為基過其下者覆釜歷歷在目不知其幾千萬也

京口之鐵甕城徒虛語耳考之志冊僅載關城為明洪武年所建而基址未詳築於何時蓋城臨海衝濤水激射非木石所能久固昔人巧出此想較之鎔鐵屑炭更為奇矣

哈密瓜

哈密古瓜州近域其瓜較內城甜美體甚鉅長尺許兩端皆銳彼國中徧種之每熟時人惟啖此以代穀食遂覺氣體豐腴有逾平昔剖晒為脯芳鮮歷久不變自彼

國臣服以來每歲常充供獻中土始嘗此味前此所未有也

三門砥柱

四十二年西巡過陝州觀三門砥柱蓋砥柱一山屹立河中禹鑿之三穿使河出其間有似門狀故曰三門也俗云南為鬼門中為神門北為人門三門之險鬼門為最唐開元時陝郡太守李齊物更鑿砥柱以通漕燒石沃醯開山巔為輓路代宗時調巴蜀襄漢麻桑竹篠為

綯以輓上陝運舟至今山上篋索深痕明顯如指前人
作為總非後人所能及也

雷聲不過百里

雷電之類朱子論之極詳無復多言朕以筭法較之雷
聲不能出百里其筭法依黃鍾準尺寸定一杪之垂線
或長或短或重或輕皆有一定之加減先試之銃砲之
屬烟起即響其聲益遠益遲得準比例而後筭雷砲之
遠近即得矣朕每測量過百里雖有電而聲不至方知

雷聲之遠近也朕為河工至天津駐蹕蘆溝橋八旗放
砲時值西北風砲聲似覺不遠大約將三百里以此度
之大砲之響比雷尚遠無疑也

海魚化麇

黑龍江一帶地方每冬令則有白項野麇從海邊來盈
千累萬不可勝數形比內地者微大肉亦肥但其味稍
腥想海魚化生之物故與山林所產不同月令云雀入
大水為蛤雉入大水為蜃想此類乎

石魚

喀爾沁地方有青白色石開發一片輒有魚形如塗雌黃或三或四鱗鰭首尾形體具備各長數寸與今所謂馬口魚者無異揚腮振鬣猶作鼓浪游泳狀朕命工琢磨以裝硯匣配以松花江石誠几案間一雅玩也嘗讀水經注及酉陽雜俎言衡陽有石魚山石具魚體宛若刻畫又池北偶談述汧陽縣有石魚溝取石破之兩兩成魚可以辟蠹故宋人石魚詩云相傳此石能辟蠹功

在琅函并玉儲然未有如斯之纖悉克肖者也其與石俱生耶抑魚之化如零陵之燕海南之蟹耶物理之不可全窮又如此

山氣

海市見之於書人皆知之不知山巒之氣亦然塞外瀚海早行春秋之際空濶之處望之亦有如城郭樓臺者有如人物旌旗者有如樹木叢生鳥獸飛舞者遠觀景象無不刻肖逼視之則不見是皆山氣之所融結可與

海市並傳也

秦達罕

秦達罕產於興安外如索約爾濟等地方即兔類也其形倍大肉味鮮潔春夏時毛色與兔略同至秋末冬初則變白如雪惟耳尖黑穎四時不改足上翬毛甚長蓋彼地嚴寒非此則不足禦冬每當春二三月孳生二次今畜於熱河山莊其毛色更變及孳生之時與在出產之地無異

聖祖仁皇帝御製文第四集卷二十六

欽定四庫全書薈要

聖祖仁皇帝御製文第四集卷二十七目錄

雜著

康熙幾暇格物編

雷楔

土魯番西瓜

地球

理氣

潮汐

沙蓬米

鮓荅

瀚海螺蚌甲

瀚海石子

青馬

櫻額

砒硝

木化石

泰山山脉自長白山來

黑龍江麥

本草藥名

查克

葡萄

堪達罕

汶上縣分水口

詩文以命意為上

落葉松

土魯番地極熱

欽定四庫全書薈要卷一萬三千一百六十五

集部

聖祖仁皇帝御製文第四集卷二十七

雜著

康熙幾暇格物編

雷楔

霹靂礧形質各殊隨地而異今各蒙古瀚海沙漠等處
嘗拾得銅錢或如鎗頭或如箭鏃錐刀之類者蓋雷斧
也雷書云雷斧銅鐵為之盛京烏喇諸地則皆石色微

青黑而通明映之瑩如玻璃其在西洋者石色沉綠明澈無異此雷楔也博物志云人間往往得石形如斧刀名曰霹靂楔者是矣又有雷墨雷鑽雷鎚不過以狀異名要皆金石質也唐人小說謂玉門西有雷廟國人年年出鑽以給雷用是誠謬言夫雷火所至萬物俱化斧楔乃雷氣之所化耳其或金或石者隨地氣而使然也

土魯番西瓜

土魯番在哈密之西其地產西瓜種最佳每熟時人入

瓜田必相戒勿語悄然摘之恣其所取瓜皆完美若一聞人聲則盡圻裂無全者亦異聞也

地球

自古論歷法未嘗不善總未言及地球北極之高度所以萬變而不得其著落自西洋人至中國方有此說而合歷根可見朱子論地則比之卵黃皆因格物窮理中得之後人想不到至理也

理氣

宋儒論理氣最好宋以前諸儒及後之學者每好為註
解註則離解則畔倒不如本文中細看或得其旨一二
若立自作之意須讀到極處然亦未必能也

潮汐

潮汐之說古人議論最多總未得其詳惟朱子之說得
其理朕到海邊如山海天津大江錢塘等處每察來去
之時與本土人詢問大約皆不同所以將各處令人記
時刻而亦不同後知泉井皆有微潮亦不準時候問及

西洋人與海中行船者皆不同所以難明依朱子之言屬月之盈昃其理甚確

沙蓬米

沙蓬米凡沙地皆有之鄂爾多斯所產尤多枝葉叢生如蓬米似胡麻而小性暖益脾胃易於消化好吐者食之多有益作為粥滑膩可食或為末可充餅餌茶湯之需向來食之者少自朕試用之知其宜人今取之者衆矣

鮓荅

鮓荅之名見於陶九成輟耕錄及李時珍本草第二云產走獸腹中不知出蛇頭及魚腹者為貴其形色亦不等相傳蒙古禱雨時投鮓荅於泉源或持咒或以手撥弄輒能致雨朕細推其理蓋泉源本靈異之地不受汙穢以不潔之物攪之是以致雨舊有燒蜥蜴即雲虎祈雨之說亦即此意今人遇泉源未有敢輕褻者無論南北皆然觀此可以知致雨之故矣

瀚海螺蚌甲

瀚海一望斥鹵無溪澗山谷而沙中往往見螺蚌甲蒙
古相傳云當上世洪水時此皆澤國也水退而為壅沙
耳因思八卦之位坎居於北故天下水源大抵從北來
孟子云洪水泛濫於中國言泛濫者指其委如此知其
源必有所自矣大凡水性就下以東南為虛壑故古來
西北澤區水匯見之史冊者今考據地志已半為平陸
且以幾千里枯瀉而仍名曰瀚海意其本來必非即沙

磧也洪水之說近似有理錄之以補前人所未發

瀚海石子

瀚海沙中生瑪瑙石子五色燦然質清而潤或如榴房乍裂紅粒鮮明或如荔殼半開白膚精潔如螺如蛤如蝶如蟬胎顰分顯眉目畢舉三年刻楮之巧未能過也又有白質黑章若畫寒林秋月霧嶺烟溪以至拽杖山橋放牛夕照之景宛然化筆朕親征厄魯特時檢得數百枚賦形肖象奇奇怪怪莫可數陳造化生物之巧一

至此乎

青馬

相傳青馬之種從海中來其性最良杜甫詩所謂安西
都護胡青驄是也說文曰馬青白色曰驄按史記天官
書房星在東天駟近之故青色者多良馬又白色屬金
金性堅久故馬白色者主壽此昔人貴青馬所由來也

櫻額

櫻額果屬也產於盛京烏喇等處古北口外亦有之其

樹藜生果形如野黑葡萄而稍小味甘澁性溫煖補脾
止泄鮮食固美以之晒乾為末可以致遠食品中適用
處多洵佳果也今山莊之千林島遍植此種每當夏日
則累累綴枝遊觀其下殊堪娛目不獨秋實之可採也
查盛京志云櫻額一名稠梨子實黑而澁土人珍之間
以作麪暑月調水服之可止瀉又查本草有楮李木高
者一二丈低者八九尺葉如李但狹而不澤子於條上
四邊生生時青熟則紫黑色若五味子至秋葉落子尚
在枝治水腫腹脹滿除疰瘕積冷今關
陝間時有之稠梨或即楮李聲訛也

砒硝

前代禁止磳硝不令出口立法甚嚴不知口外頗多產硝之地喀爾喀厄魯特地方有白色土熬之即為硝比中土所產更佳始知天下有用之物隨地皆有初不以中外異也

木化石

黑龍江烏喇等處水極涼河中嘗有木化為石形質與石無異而木之紋理及蟲蠹之跡仍宛然未泯或有化石未全猶存木之半者以之磨礪刀箭比他石為佳又

鹿角人骨亦能變石造物之巧種種化機非意想所能及也

泰山山脉自長白山來

古今論九州山脉但言華山為虎泰山為龍地理家亦僅云泰山特起東方張左右翼為障總未根究泰山之龍於何處發脉朕細考形勢深究地絡遣人航海測量知泰山實發龍於長白山也長白綿亘烏喇之南山之四圍百泉奔注為松花鴨綠土門三大江之源其南麓

分為二幹一幹西南指者東至鴨綠西至通加大抵高麗諸山皆其支裔也其一幹自西而北至納祿窩集復分二支北支至盛京為天柱隆業山折西為醫巫閭山西支入興京門為開運山蜿蜒而南磅礴起頓巒嶺重疊至金州旅順口之鐵山而龍脊時伏時現海中皇成鼉磯諸島皆其發露處也接而為山東登州之福山丹崖山海中伏龍於是乎陸起西南行八百餘里結而為泰山穹崇盤屈為五嶽首此論雖古人所未及而形理

有確然可據者或以界海為疑夫山勢聯屬而喻之曰龍以其形氣無不到也班固曰形與氣為首尾今風水家有過峽有界水渤海者泰山之大過峽耳宋魏校地理說曰傳乎江放乎海則長白山之龍放海而為泰山也固宜且以泰山體位證之面西北而背東南若云自函谷而盡泰山豈有龍從西來而面反西向乎是又理之明白易曉者也

黑龍江麥

黑龍江所產之麥最佳色潔白性復宜人相傳中國麥種之佳者係西域携來鄂羅斯地在西陲萬里有餘黑龍江上流原係鄂羅斯所居其種亦自西來所以麥之佳較他處尤勝也

本草藥名

藥料之名有中外聲音相似者如本草之訶黎勒土伯特呼為阿魯拉大約此種原產自外蕃傳入中土故因仍舊名但聲音微有不同耳如本草中有莧苳子

莧苳音浪

蕩其名即蕃名似亦從外蕃傳來不察來由多為解說
勉強附會者不止於此皆可無庸也

查克

查克木名也瀚海一帶多有之其樹無皮當枝幹青翠
時着火即燃不必待其枯槁燒時有燄而無烟與炭相
似且耐久不熄亦木中罕見者

葡萄

葡萄來自西域中土所有之種無多近得哈密回子等

地方各種植於苑籞中結實有白者綠者紫者長如馬乳者又一種大葡萄中間有小者名公領孫又一種小者名瑣瑣葡萄種類雖殊食皆甘美移植南方便失本味大約其性於北方沙石水土相宜

堪達罕

索約爾濟等地方有獸名堪達罕鹿類也色蒼黑項下有肉囊如繁纓大者至千餘觔其角寬扁以之為決

詩經

決拾既飲注決以象骨為之著於右手大指所以鉤弦開體

勝於象骨世人貴之其

四蹄能驅風凡轉筋等症佩於患處為效甚速

汶上縣分水口

朕屢南巡經過汶上縣分水口觀過汶分流處深服白
英相度開濬之妙考河渠通漕諸書初元人過汶水北
出陽穀以通衛水南出濟寧以通泗水其分水之處為
會源牐即今濟寧之天井牐也然按其地勢南自沽頭
以達河淮洵為便利而北由安居至南旺南旺地高於
天井安能激水逆流而使之分乎故當時雖多設牐壩

而嘗患漏竭即水盈滿亦僅可勝小舟而已至明永樂時總督河道宋禮用老人白英之策築戴村壩以遏汶導之出鵞河口入南旺湖然後分流南北以分水口為水脊因勢均導南得四分北得六分增修水牐以時啓閉漕運遂通今南北流惟吾所用如淺於南則閉南旺北牐淺於北則閉南旺南牐湖泉並注南北合流雖有旱暵靡不有濟每歲東南漕艘無或滯留此皆白英遏汶分水之功也相傳英當日每徘徊汶濟之間積數十

年精思一旦確有所見決為此議三百餘年行之無弊
所謂因地之宜順水之性也

詩文以命意為上

詩文之道以命意為上意在筆先然後發為文詞形諸
歌詠自能超出衆人之表令讀者尋味無窮所以古來
名人著作皆言近而旨遠千載而下猶如見其心思聆
其謦欬此皆以敬誠意勝不徒以華麗文勝也若冒無
卓見於理祇以鋪叙辭藻為工雖豐彩可觀而實意已

鮮欲以傳世而行遠不亦難乎

落葉松

五臺及口外興安高寒之地有樹名落葉松枝幹與杉無異而針亦青蔥如蓋惟經霜雪後則葉盡脫其木質甚堅有微毒斫伐時誤入肌膚驟難平復根株歷久不朽沉埋水土中則變為石可供磨礪之需亦松杉之別種也

土魯番地極熱

土魯番地方去雪山不過百里之內天氣極熱其人皆
入夜始出耕種若日出以後則暑不可耐且其地多磧
石赤日中石熱如火觸之有焦爛之患古稱西域流沙
多熱風人物當之皆迷仆或疑其言之太過由今觀之
實有符於古所傳者

欽定四庫全書薈要

聖祖仁皇帝御製文第四集卷二十八目錄

雜著

康熙幾暇格物編

文章體道親切惟有朱子

回子地產絲

蒙古居處有定

白龍堆

水多伏流

同聲相應

回子多元子孫

阿霸亥鹽

繫黍

溫泉

熬水

朝鮮紙

飛狐

馬口柴

欽定四庫全書薈要卷一萬三千一百六十六

集部

聖祖仁皇帝御製文第四集卷二十八

雜著

康熙幾暇格物篇

文章體道親切惟有朱子

朕自冲齡留心載籍嗜讀古人之文選秦漢以及唐宋諸名作彙為一書逐篇親加評論名曰古文淵鑒旋授梓頒賜以廣其傳於天下邇年來常置案頭以備溫習

茲於避暑山莊萬幾之暇繙閱經史性理諸書復取古文披覽一過其中氣韻古雅辭藻典贍各擅所長固極文章之能事至於體道親切說理詳明闡發聖賢之精微可施諸政事驗諸日用實裨益於身心性命者惟有朱子之書駕乎諸家之上令人尋味無窮久而彌覺其旨此朕讀書嗜古閱歷數十年之後有得於心特為拈出善讀書者當必能知之

回子地產絲

西北回子地方產絲綿以之製甲其堅固勝於中土大約四十層可敵浙江之絲八十層向來不知外國出絲也

蒙古居處有定

塞外情形不可臆度必親履其境然後能知之古稱蒙古遷徙無常但逐水草而居似乎無一定之所可以任意栖止矣不知塞外地雖空曠亦有水草不能相兼者若有草無水雖欲駐牧於此其勢斷有所不能是知羶

廬毳幕常有不定之形而其實則不越乎平日所居之故址也又古人嘗謂春月蒙古馬瘦朕北征時正值春月未見蒙古不能移動倘遇寒風雨雪內地所騎馬騾之類在京中毛已換盡故有倒壞口外地寒其馬冬毛猶在所傷者皆內地之馬蒙古之馬依然無恙此亦古人未親履其地而論之也

白龍堆

白龍堆古沙磧也漢時為樓蘭姑師地今蒙古部落敖

漢奈曼等居其東阿霸垓阿霸哈納爾鄂爾多斯等居其西巴林等居其北四十九家半界於龍堆考邊衛志云龍堆沙形如土龍身高者二三丈卑者丈餘東倚三危北望蒲昌為西極要路朕時北巡親履其地見所謂龍堆者長者十數丈短者亦三四丈形蜿蜒如龍非可以高卑論也土人云龍形皆頭向東南尾朝西北驗之信然又其形無定處今日隆然而起者明日已為平沙而或左或右之間又隱隱聚成龍形矣是非僅風力所

卷二十一
能散聚蓋其靈氣凝結變化無方真似龍耳史志所記
未能詳也

水多伏流

尚書疏言濟水三伏三見水經注言黃河三伏三見桑
乾黑水亦伏而再見以為水之脉遠性厚者乃然不知
天下之水伏流者甚多不足異也朕每見口外諸小川
流而忽隱隱而復流者在處有之故杜甫詩云塞水不
成河言其斷續不成通川耳今京師暢春園之萬泉莊

平地湧泉匯於丹稜汧循汧而西至西勾注為小溪又

南為陂者五六至東雉村

東雉村今名慈家務

水入地中伏行至

六里河重源濬發合聖水龍泉東注拒馬此可按地脉

而求者也世人不能隨地考驗故少見多怪明王嘉謨

海澱記但云丹稜汧水忽顯忽隱而未究其隱歸何處

魏土地記述當時諺云高粱無上源清泉無下尾夫有

本之水放乎四海寧有一發即竭有源而無委乎是知

凡渟而為淵瀦而為澤必有經流潜通暗注故能久而

不涸也以類推之海西所謂地下有海亦理之所有者
同聲相應

審音之道理極平易而闇者不識皆由習焉弗察耳即
以人聲論之喜怒動於中聲音達於外當其情動聲發
聽者不必觀氣採色可以知其情之為喜為怒也又兩
人對語其發聲高者則應之者亦高其發聲卑者則應之
者亦卑反是則不和矣此即同聲相應自然之至理也
惟樂亦然發於何音止於何音為某調為某宮為某字

是猶聞人聲而辨其情之何屬也取琴瑟之類置二器
均調一律鼓此器一絃則彼器虛絃必應推之八音之
屬皆然莊子所謂以陽召陽以陰召陰鼓宮宮動鼓角
角動音律和矣是猶人聲相感高卑相應也夫天地精
微之理皆在現前而人不能格物窮理朱子所謂愚者
不及智者過之也至若清池之方響應麋賓而躍光宅
之塔鈴應姑洗而鳴志籍所載或驚為怪異或疑其虛
無此雖皆耳食者然亦因前人之說過於高遠也朕故

以人聲之感應明之亦近取諸身之一端耳

回子多元子孫

西北回子種類甚多當日元太祖征服回子諸國悉有其地因命諸子分統之是為部落之主歲月既久語言行事及服食器用遂習回子風俗無復蒙古之舊而其實皆元之苗裔也

阿霸垓鹽

鹽之種類不一南方所用海鹽井鹽皆須煎熬烹煉山

西解州鹽池如耕者之䟽為畦隴引水灌其中俟夏秋
南風一起即結成鹽印故昔人以為海鹽并鹽資於人
解鹽資於天也獨阿霸垓部落及張家口外牧圉之地
有鹽一種出水澤中不待煎熬而自成亦不待南風而
後結土人就近取之其塊大小不等色青黑味甚佳不
減於中土所產者始知天生百物以備民用隨在各足
禮記所謂天時有生地利有宜也

系黍

繫黍之說羣儒辨論紛紜而終無定準李照以縱黍繫尺而太長胡瑗以橫黍繫尺而太短房庶以實千二百黍為黃鍾之長而馬端臨譏其非通論是皆止言黃

為九寸而不知此九寸為何代之尺也朕親繫黍測驗今營造尺適符縱黍一百之數而橫黍一百止當縱黍八十一而以千二百黍實之黃鍾亦無不合特古者二十四銖為一兩今二十四銖僅半兩耳此猶古之一石乃今之五斗也是知所謂黃鍾九寸者乃周尺之九寸

若以今尺九寸求之則失矣而後人各以時尺論之不
亦謬乎又古者論黍以上黨羊頭山產者為貴而猶疑
歲有豐歉則黍有大小必求一稊二米者是大不然朕
今隨地取黍檢擇大者繫尺為縱為橫為銖為兩不爽
毫釐蓋得其根本則自無差忒因知昔人之定分寸度
空徑獨有取於黍者五穀惟黍粒均齊餘則不能無大
小之故也

溫泉

溫泉可以療疾。蠲病人盡知之而不知。尤宜於年長之人。若四十以內者。初浴湯池時。反覺氣弱。必久而後復。蓋人至四十以外。筋骨少衰。氣多收斂。得溫和之助。自然精神怡暢。若少年血脉方剛。更以純陽之氣蒸逼之。汗液越泄。精氣外散。不無少損。李時珍曰。入浴後當大虛憊。此未分老少之論也。又浴湯池必以七日為期。湯之功力。始到再靜養七日。調攝心志。導和引元。則一身之氣脉充足。諸疾自愈。張說溫泉箴云。若入溫泉居食。

失節動出輕躁莫之或益傷之者至矣故君子慎微此至言也

熬水

泉水所發其源流清遠及色味少異者下必有金石之物而溫泉尤顯而易見者也然古人往往不能辨如泉志所載云新安黃山是硃砂泉春時水即微紅故也或云硃砂雖紅而不熱當是雄黃臨潼驪山是礬石泉或云礬石不香應是硃砂本草云溫泉下有疏黃氣味雖

惡而可愈疾然有一種砒石者與硫黃相似浴之有毒不可不慎夫以一二有名之溫湯千百年來尚不能確指為何泉若遇荒山窮谷之中又何以辨乎是蓋未得熬水徵驗之法也朕每遇溫泉即以銀碗盛水隔湯用文火收煉俟碗水乾觀水脚所積或為礬石或為鹵鹵或為硫黃等皆判然分曉且視所積之輕重而水性之清濁及浴人之損益皆可知矣較之昔人懸虛擬議辨之於色香味而究無捉摸者不實有可據而足憑乎

朝鮮紙

世傳朝鮮國紙為蠶繭所作不知即楮皮也陸璣詩疏
謂之楮桑又曰江南人擣以為紙光澤甚好蓋以其形
似桑也朕詢之使臣知彼國人取楮樹去外皮之麤者
用其中白皮擣煮造為紙乃綿密滑膩有似蠶繭而世
人遂誤傳耶

飛狐

飛狐產於口外密樹林中形似狐肉翅連四足及尾能


飛但能下而不能上續博物志云飛狐亦名飛生今山
陝有飛狐嶺飛狐口當時必以物產得名而名勝志曰
有狐食五粒松子遂成飛仙其說荒誕皆因未知天下
有所謂飛狐也口外又有飛鼠與飛狐相類特頭尾似
鼠形體小於狐荀子所謂鼯鼠五技而窮也此種荆楚
間亦多有之惟飛狐獨西北乃有耳

馬口柴

明時宮中用馬口柴俱取給於山西蔚州廣昌直隸昌

平諸州縣其柴長四尺許整齊白淨兩端刻兩口以繩
縛之故謂之馬口柴康熙初年炊爨還用此今惟天壇
焚燎用之故近世人見之者甚少且有不知其名者

聖祖仁皇帝御製文第四集卷二十八



總校官庶吉士臣侍朝

校對官檢討臣王鍾健

謄錄貢生臣李敬敏

欽定四庫全書薈要

集部

聖祖仁皇帝御製文四集卷二十九至三十二

詳校官原任編修臣徐立綱

欽定四庫全書薈要

聖祖仁皇帝御製文第四集卷二十九目錄

雜著



康熙幾暇格物編

黃河九曲

老人星

趙孟頫命名

九河故道

楊柳

風隨地殊

風無正方

水底有風

人依土生

定南針

兩尺脉屬兩腎

欽定四庫全書薈要卷一萬三千一百六十七

集部

聖祖仁皇帝御製文第四集卷二十九

雜著

康熙幾暇格物編

黃河九曲

始閭圖曰黃河自崑崙來凡九曲入於渤海每曲千里
河圖以黃河九曲配上天權勢距樓等九星謂二曲在
荒外七曲在中國又自積石以下分為四大折此特舉

其大者言之耳朕自寧夏橫城登小舟順流而下至湖灘河所二十一日其險不可勝言河勢之洶湧與內地相同其性遷徙無定攝東則西岸漲攝西則東岸漲沙灘洲渚隨水變更互出錯列又兩涯或有高山大谷紆餘盤折以挾束之河豈能直行千里乎如山西之蒲坂古謂之河曲春秋秦人晉人戰於河曲是也而太原府又有河曲縣輿地志云以河曲得名即潼關之河亦正當其曲處唐人張祜潼關詩云地勢遙尊岳河流側讓

關可證也而皆非千里一曲之處是知河之曲處多矣
水經注曰黃河千里一大曲百里一小曲庶幾近之史
記曰黃河如帶則當時河形正自折旋環抱也況自南
徙以後自孟津而下久已非九曲之舊矣其隨地迴屈
又何可勝數哉

老人星

偶閱遼史穆宗紀應歷十二年春二月蕭思溫奏老人
星見乞行赦宥夫星辰雖隨天運行而其隱見却有方

隅老人星在今揚州地方於二三月時每每見之若北方則不能見惟於天球上可指而知耳故名南極老人言是星之屬乎南也史記天官書張守節注云老人一星在弧南常以秋分之曙見於丙春分之夕見於丁丙丁皆南方此明證也遼都臨潢府地處最東北安有老人星見之理乎

趙孟頫命名

趙孟頫取名孟頫之義考之諸書皆無據證按說文長

箋云頰從兆從頁卽氏言得兆必敬頰低頭聽也有敬
意又按宋史宗室世系表凡太祖十一世孫皆名孟某
是孟字乃其世系排次而孟頰同產十人其名上字從
孟下字皆從頁旁如孟頰孟顙其著者也或取頰字之
義或取敬字之義耳又孟頰一輩皆字子某如孟頰字
子昂孟顙字子俊孟堅字子固似上一字取孟子二字
相連下一字取頰昂顙俊堅固二字相連之義亦未可
知

九河故道

九河故道漢唐宋諸家之說不一或謂在濟南境內或謂遠界永平而酈道元謂九河苞淪於海以朕揆之其九河入海之處在今天津之直沽而九河故道不出滄景二三百里間也蓋水性就下今南北之水以天津為尾閭地最窪下雖數千百年中或陵谷變遷而其高卑大勢南北定位有必不可易者即以禹貢之文考之以斷矣禹貢曰至於大伾北過泲水至於大陸又北播

為九河疏云大伾屬魏郡黎陽洚水在信都大陸澤名
夫黎陽今之濬縣信都今之深州大陸澤在今之東鹿
界而河間在濬縣深州東鹿之北故曰又北也又九河
既道疏云平原以北平原今德州境言德州以上也漢
書溝洫志許商云九河之名有徒駭胡蘓鬲津在成平
東光鬲界中此三地今皆屬河間杜氏通典云鉤盤在
景馬頰覆釜在趙郡景即景州趙郡今涿易南古所謂
燕南趙北也輿地記云簡河在臨津金史地理志云南

皮縣有潔河太史河傳志所載九河故道之在河間境也又豈不彰明備著乎則天津為同為逆河入海之道無疑矣河自周定王時已南徙九河故跡亦漸湮廢後人不能深究地勢多穿鑿傳會其指在濟南者既失之過南其指在永平者又失之過北而鄭康成據緯書謂齊桓公填塞八河以拓疆界其說益滋謬耳凡人讀書能正據經文考以古今形勢則諸家之說自有折衷夫河間古郡稱名已久其所以謂之河間者以其在九

河之間也顧名思義又可知矣

楊柳

古今物疏於草木之名皆不能區別如楊柳本二木二木之內柳又有十餘種楊亦有數種注釋家往往合稱之即有分之者於楊則曰似柳於柳則曰似楊不知二木迥然不相似也楊之葉厚而濶色深而光其枝粗硬而白枝頭結蕊累累如懸鈴春盡時則四拆中落白花如羶柳之葉狹而長色淺而黯其枝柔細而綠葉間著

花如蕚花後則成絮而飛二木之不同如此易曰枯楊生稊詩曰東門之楊又曰折柳樊圃經傳所載原未嘗合一也即小雅所稱楊柳依依是言春時楊與柳俱依然也周禮膏物注曰謂楊柳之屬之屬云者猶言某某類耳自毛傳注楊柳為蒲柳而後人遂合為一不知蒲柳生水澤中可為箭筈別是一種詩人騷客承襲詞章不能精求物類然其於楊花則祇曰花於柳花則曰綿曰絮是亦不能掩其異矣至李時珍注本草謂楊枝

硬而揚起故曰楊柳枝弱而垂流故曰柳是又以直柳垂柳指為楊與柳之分其謬益甚多識之學不亦難乎
風隨地殊

諺云千里不同風百里不同雨昔人謂雨有咫尺之殊何必百里不知風亦不可以千里論也嘗記驗風候如畿內是日為西北風山東去京為近而其日風乃東南蓋風隨地起隨地而殊抱朴子謂鳴條之風百里折枝之風五百里是言風之有無初不論方向也朱子曰風

與天相似旋轉未嘗息此處無風或旋在他處或旋在上面都未可知茲論最善又上下之間亦有不同者如起火初迸裂時其烟南向及升雲際烟又北向此其驗也

風無正方

呂氏春秋以八風配方隅而繫以四時春秋運斗樞以四方配四時而分主客其說亦有未盡然者朕留心觀察凡風自西南起者為主風餘俱屬客風易之先天巽

卦在西南可見聖人取義之精為萬古不可易也又淮南子云風者天之偏氣偏字義旨微妙蓋風之所起不自東西南北正向皆從四隅而發及其旋轉則有時而偶值正方曾以此諭海西人彼初未深信令至觀星臺驗相風烏乃嘆服焉此皆切近之事却未有人道出

水底有風

風者氣也氣無處不流風亦無處不到故水上行風水下亦行風東風解凍先從下圻知水底風力更猛迅也

元人雜說載有人浴於河者卒中寒風拘攣謂風來水底其利如箭理實有之

人依土生

五行皆為民用而土為之主人之始終皆依於土不可須臾離也五穀果蓏之屬飛走潛動之類總為土產故書大義云土者萬物之所資生是為人用禮外傳注云人皆食土之物養成形體嘗聞泛洋之人水居日久一至陸地覺土香異常至欲俯首就而食之是可見人之

不能離土矣莊子曰百昌生於土而反於土信然

定南針

定南針所指必微有偏向不能確指正南且其偏向各處不同而其偏之多少亦不一定如京師二十年前測得偏三度至今偏二度半各省或偏西或偏東皆不一惟盛京地方得正南今不知改易否也宋沈括夢溪筆談謂磁石磨針必微偏東向而元周達觀真臘風土記謂定南多丁未針大觀本草注謂丙丁皆火位庚辛受

其制物理相感耳而推求真南之道昔人未嘗言之朕
曾測量日影見日至正南影必下垂以此定是正南真
向也今人營造居室如因地勢曲折者面向所不必言
若適有平正之地其所卜建屋基向東南者針亦東南
向西南者針亦西南初非有意為之乃自然而然無所
容其智巧者也又赤道之下針定向上此土針鋒亦畧
斜向上今羅鏡中制之平耳海西人云磁石乃地中心
之性一尖指地一尖指赤道今將上指者令重使平以

取南與物性志謂磁石受太陽之精其氣直上下之說
相合

兩尺脉屬兩腎

人身藏府皆表裡相配於五行各有專屬肺與大腸為
表裡屬金心與小腸為表裡屬火肝與膽為表裡屬木
脾與胃為表裡屬土腎與膀胱為表裡屬水惟命門為
虛寄或云屬火或云屬水總無確說西北醫家謂左右
尺脉分屬左右腎皆水也細思其言頗為近理朱子曰

屬北方者便著用兩字元亨利貞貞配智北方水地文言以貞固二字釋之方神朱雀青龍白虎皆一北方玄武便有龜蛇二者矣又左傳蔡墨對魏獻子五官金木火土之正皆用一人為之至水正則曰修及熙為玄冥以二人治之即此義也

聖祖仁皇帝御製文第四集卷二十九

欽定四庫全書薈要

聖祖仁皇帝御製文第四集卷三十目錄

雜著

康熙幾暇格物編

菓蓀

普盤

各作泥臘

徐樹

阿濫

金光子

葛仙米

倒吊果

林檎

人中

鼯鼠

地震

欽定四庫全書薈要卷一萬三千一百六十八集部

聖祖仁皇帝御製文第四集卷三十

雜著

康熙幾暇格物編

菓萆

菓萆出陝西查本草注云菓萆以楸子為之即劉熙釋名所謂柰油也不知楸子所成特黃色一種耳有紅黑二種則以哈菓為之哈菓出肅州及寧夏邊外回子呼

為哈武今口外亦隨處有之枝幹叢生有柔刺不甚高
大其皮可以飾箭溜矢把耐久倍於桃皮葉似野蒲萄
而小結實攢聚秋深乃熟或赤色或青黑色故俗亦名
紅菓黑菓邊人云秋時採取摘去枝梗將菓下鍋熬出
津液漉去渣滓煉成薄膏貯別器內候少涼膏欲凝結
畧如紙房抄紙法以木為匡抄而成皮勻薄如油紙揭
起陰乾紅菓成者色紅黑菓成者色黑土人以之餉遠
亦名菓煨皮以自熬煨而成也乃哈菓之名書籍皆不

載是知古今方物畧而弗脩者何可勝記也

普盤

普盤即木莓一名懸鉤子爾雅所謂薊也按本草云懸
鉤樹生高四五尺其莖白色有倒刺其葉有細齒頗似
櫻桃葉而狹長又似地棠花葉四月開小白花結實色
紅味酸美人可多食之有以為即覆盆誤也蓋莓有三
種藤生緣樹而起者大麥莓乃入藥之覆盆也樹本挺
而叢生者木莓一名山莓即普盤也草本委地而生者

地莓亦名蛇莓不可食今江南人謂之蛇盤也

各作泥臘

西洋大紅出阿末里噶彼地有樹樹上有蟲俟蟲自落以布盛於樹下收之成大紅色蟲名各作泥臘考段成式酉陽雜俎有紫釰出真臘國呼為勒佉亦出彼國使人云是蟻運土於樹端作窠結成紫釰唐本草蘓恭云紫釰正如臘蟲研取用之吳錄所謂赤膠亦名紫梗色最紅非中國所有也又考元周達觀真臘風土記云紫

梗蟲名生於一等樹上其樹長丈餘枝條鬱茂葉似橘
經冬而凋上生此蟲正如桑螵蛸之狀葉凋時蟲亦自
落國人用以假色亦頗難得又唐人張彥遠名畫記云
畫工善其事必利其器研鍊重采用南海之蟻鉶按今
西洋之各作泥臘大小正如蟻腹研淘取色有成大紅
者亦有成真紫者用之設采鮮艷異於中國之紅紫是
即古之紫鉶無疑而北宋以前畫用大紅色至今猶極
鮮潤者實緣此也

桧樹

楓樹南北不同北方原無楓樹之名自南巡見楓樹方知北方之桧木即是楓樹但南方厥木惟喬所以直生北方厥木惟叢故矮短耳其枝葉則相同也

阿濫

阿濫之名見唐詩紀事驪山有小禽名阿濫堆

禽經作鷓鴣鳥

善鳴明皇御玉笛採其聲翻新曲且名焉張祐詩云至今風俗驪山下村笛猶吹阿濫堆通雅云鷓鴣驪山鳥也

一名阿濫堆則古名鷺矣

爾雅鷺鷥鷺鷥疏云鷺一名鷺鷥

亦作鷺濫讀

安與阿音近

韋昭所謂鷺鷥鷺鷥詩不見阿濫堆決起隨衝

風此鳥有二種一種鳳頭者高誘呂覽注所謂鷺一名冠雀是也一種無鳳頭者彙雅所謂阿蘭似百舌而無毛角是也江南人呼為鷺鷥或訛為烏鷺

金光子

金光子閩人呼酸棗樹極高大葉長而尖如橄欖四月開花淺綠色結實如大棗八月始熟色黃故亦名金棗

收乾則紫赤色味酸核圓而堅多竅人心之狀圓外竅中故此果專為心家藥閩書云酸棗出福州建寧福寧建寧人以為糕與楮糕相似或云其種自西域佛國來取其核就天然罅孔處雕鏤作羅漢形為念珠按政和本草圖經云酸棗真者最不易得其木高數丈徑圍一二尺木理極細堅而且重皮亦細紋似蛇鱗其核仁大而色赤如丹今市之貨者皆棘實耳

葛仙米

葛仙米生湖廣沿溪山穴中石上遇大雨衝開穴口此
米隨流而出土人撈取初取時如小鮮木耳紫綠色以
醋拌之肥脆可食土人名天仙菜乾則名天仙米亦名
葛仙米以水浸之與肉同煮猶作木耳味大約山洞內
石髓滴石而成性寒不宜多食聞他府及四川時有之
必遇水衝乃得歲不常遇他如深山背陰處大雨之後
石上亦間生然形質甚薄見日則化或乾如紙不可食
矣又梧州府志葛仙米出北流縣勾漏洞石上為水所

漬而成石耳類也采得暴乾仍漬以水如米狀以酒泛之清爽襲人此原非穀屬而名為米俗云晉葛洪隱此乏糧采以為食故名嶺南襍記云韶州仁化縣丹霞山產仙米徧地所生粒如粟而色綠煮熟大如米其味清腴大抵南方深山中皆有之也

倒吊果

倒吊果俗名吊搭果形似山梨而小體微長味酢肉多沙長蒂諸果始生時皆向上此果花實皆下垂故名生

時堅澁熟乃沙性暖利健脾消食樹枝葉俱如梨為秦
中物產今遵化沿邊有之而考之書籍草木諸譜皆不
載倒吊之名惟司馬相如上林賦云荅還離支荅還音
近打拉張揖注云荅還果名按梅堯臣牡丹詩用打拉
二字北人方言以歌垂為打拉是荅還名果或因其下
垂也說文海篇俱作搭榧果今名吊搭或是荅還音之
轉耳

林檎

李類甚繁林檎其一也樹不甚高枝葉皆如李花白唐人謂之月臨花實如李而差小有黃紅二種本草所謂金林檎紅林檎是也獨核有仁味甘津亦名來禽亦名蜜果此果味如蜜能來衆禽於林故得林檎來禽蜜果諸稱學圃餘疏謂花紅即古林檎誤矣花紅柰屬也柰有數種其樹皆踈直葉皆大而厚花帶微紅其實之形色各以種分小而赤者曰柰子大而赤者曰檳子白而點紅或純白圓且大者曰蘋婆果半紅白脆有津者曰

花紅綿而沙者曰沙果西京雜記所以有素柰青柰丹
柰之別也又有海棠果通志謂之海紅而關西有楸子
有楹棹滿州呼山楹曰楹棹與陝西同音查梅堯臣有
得沙苑楹棹詩政和本草附載楹棹於柰內是
宋時已有此稱其始或從陝西流名亦皆柰類蓋李之
關外或從關外通音陝西俱未可定
與柰其枝葉花實固區以別而其子核之異尤最易辨
堅而獨者李類柔小而四五粒者柰類草木諸書皆以
林檎附於柰內其亦未嘗體認物性矣

人中

人之水溝穴在鼻下口上一名人中脉論奇經諸書謂
任督二脉一行於身之前一行於身之後會於素膠水
溝斷交三穴三穴為面中三水溝又為三之中故名人
中也一說人有九竅自鼻以上皆兩自口以下皆一此
居其中故云是但釋中之義耳而王逵蠡海集為之說
曰所謂人中者天食人以五氣鼻受之地食人以五味
口受之人中蓋居人身天地之中也此又未免穿鑿蓋
人受天地純全之氣成形四肢百骸能得其全獸則得

其偏如猿猴猩猩之類凡諸寓獸亦似人形而其鼻柱直脣之間總無此水溝一段以此辨人之獨異於獸水溝之所以得人中名也今滿洲呼呢呀爾馬蒙古呼庫門高麗呼薩拉蜜皆直曰人而已可見義理真確自可通之六合竊疑古人氣穴辨論何以未經道此及閱素問骨空篇注有鼻人二字是古人亦祇呼為人矣

鼯鼠

俄羅斯近海北地最寒有地獸焉形似鼠而身大如象

穴地以行見風日即斃其骨亦類象牙白澤柔滑紋無損裂土人每於河濱土中得之以其骨製碗櫟梳篋其肉性甚寒食之可除煩熱俄羅斯名摩門索窪華名鼪鼠乃知神異經所云北方層氷之下有大鼠肉重千觔食之已熟字書謂鼪鼠別有一種大於水牛穿地而行見日月之光則死皆即此也

地震

朕臨攬六十年讀書閱事務體驗至理大凡地震皆由

積氣所致程子曰凡地動只是氣動蓋積土之氣不能純一悶鬱既久其勢不得不奮老子所謂地無以寧恐將發此地之所以動也陰陽迫而動於下深則震雖微而所及者廣淺則震雖大而所及者近廣者千里而遙近者百十里而止適當其始發處甚至落瓦倒垣裂地敗宇而方幅之內遞以近遠而差其發始於一處旁及四隅凡在東西南北者皆知其所自也至於湧泉溢水此皆地中所有隨此氣而出耳既震之後積氣既發斷

無再大震之理而其氣之復歸於脉絡者升降之間猶不能大順必至於安和通適而後反其寧靜之體故大震之後不時有動搖此地氣反元之徵也宋儒謂陽氣鬱而不申逆為往來則地為之震王歷通政經云陰陽太甚則為地震此皆明於理者西北地方數十年內每有震動而江浙絕無緣大江以南至於荆楚滇黔多大川支水地亦隆窪起伏無數百里平行者其勢歆側下走氣無停行而西北之地彌廣磅礴其氣厚勁空涌而

又無水澤以舒洩之故易為震也然邊海之地如臺灣
月輒數動者又何也海水力厚而勢平又以積陰之氣
鎮乎土精之上國語所謂陽伏而不能出陰迫而不能
烝於是地震此臺灣之所以常動也謝肇淛五雜組
云閩廣地常動說者謂濱海水多則地浮夫地豈能浮
於海乎此非通論京房言地震云於水則波今泛海者
遇地動無風而舟自蕩搖舟中人輒能知也地震之由
於積氣其理如此而人鮮有論及者故詳著之

聖祖仁皇帝御製文第四集卷三十

欽定四庫全書會要

聖祖仁皇帝御製文第四集卷三十一目錄

雜著

康熙幾暇格物編

江源

恒河

浮白

御稻米

食氣

鳥舌

地中有火

禽鳥肫肚之別

賦

時和年豐慶祝賦并序

欽定四庫全書薈要卷一萬三千一百六十九

臬部

聖祖仁皇帝御製文第四集卷三十一

雜著

康熙幾暇格物編

江源

中國水之大而流長者惟河與江其源皆出西番界河之源自元史發明之後人因得知其大畧江之源則從未有能確指其地者酈道元水經注頗言其端委而於

發源之處則云以今所聞殆未濫觴道元亦闕疑而弗
敢定也今三藏之地俱歸版籍山川原委皆可案圖以
稽乃知所謂岷山導江者江水泛濫中國之始禹從此
水而導之江之源實不在是也江源發於科爾坤山之

東南有三泉流出

一自匝巴顏哈拉嶺流出名七七拉
噶納一自麻穆巴顏哈拉嶺流出名

麻穆七七拉噶納一自巴顏吐呼母巴顏
哈拉嶺流出名古科克巴哈七七拉噶納合而東南流

土人名岷捏撮岷捏撮者譯言岷江也是為岷江之源
南流至岷納克地名鴉龍江又南流至占對宣撫司會

打冲河入於金沙江東流逕雲南境至四川叙州府與
川江合是真江源根據後人但見打冲河之入金沙金
沙之入川江而又據禹貢東別為沱之文謂川江為岷
江溯流以窮源謂江源必在黃勝關外不知鴉龍江之
上流實為江源也故導江之江有蜀江離江錦江都江
之稱隨地隨時異名而不得專岷江之目者非其源也
宋范成大陸游亦嘗言之范成大吳船錄曰江源自西
戎由岷山澗壑中出而合於都江今書所云止自中國

言耳陸游入蜀記曰嘗登岷山欲窮江源而不可得蓋自蜀郡之西大山廣谷西南走蠻箐中皆岷山也則江所從來遠矣二說皆知黃勝關流入之江非江源而不能定其所在後人反據禹貢文以辨其非漢書地理志謂岷山在湔氐道西徼外江水所出言雖無弊特不知所謂徼外者今科爾坤山之東南耶抑即黃勝關外地也元史云江水出蜀西南徼外東至於岷山而禹導之可謂得其方矣而不能明悉如記河源者蓋河自達實

奉使後始得其源大江濬發之地從無人至者元世祖
南征即從蔥嶺而南直達天竺緬甸由雲貴逕湖廣以
返路在江源之外故不得其詳也然亦有至其地而究
未能辨之者明之宗泐是也宗泐使西域歸云西番抹
必力赤巴山有二水在東北者為河源在東南者為犛
牛河江源也犛牛河即麗江一名金沙江者宗泐但見
是水之先合於金沙江而後合於川江不知金沙江別
源於西番之乳牛山去江源西千餘里乃謂岷江即金

沙誤矣數家之說猶近於影響其餘荒唐散漫更無可採隋經籍志有尋江源一卷其書不傳間見地記有引之者其說云岷江發源於臨洮木塔山臨洮今洮州衛洮河橫亘於南江豈能越洮河而南下耶即有其書必多舛錯亦不足觀已惟明徐弘祖有溯江紀源一篇頗切於形理弘祖曰河入中國歷省五而入海江入中國亦歷省五而入海計其吐納江倍於河按其發源河自崑崙之北江自崑崙之南

按崑崙即科爾坤之訛非真崑崙也

非江源短

而河源長也又云北龍夾河之北南龍抱江之南中龍
中界之北龍祇南向半支入中國惟南龍磅礴半宇內
其脉亦發於崑崙與金沙江相並南下環滇池以達五
嶺龍長則源脉亦長江之所以大於河也至李膺益州
記云羊膊嶺水分為二派一東南流為大江一西南流
為大渡河元金履祥釋禹貢從之夫大渡河源發於四
川大邑縣之霧中山至嘉定州合川江其去岷江真源
東西相隔千餘里去禹導江之處南北亦相懸五百餘

里禹貢導江之處在今黃勝關外乃褚山而云俱發於羊膊嶺何其謬耶

此皆未得其真惑於載籍以意懸揣而失之也學者孰從而徵之故詳記江源并論列諸家之說於篇

恒河

釋氏之書本自西域其紀山川似乎荒怪然亦頗有依據不可盡非其言小有舛錯者或述之傳聞或譯於筆授轉相記說而訛耳如因本經云阿耨達山頂有阿耨達池池東有恒伽河從象口出流入東海南有辛頭河

從牛口出流入南海西有博叉河從馬口出流入西海

北有斯陀河從師子口出流入北海後人據文疑水從

牛馬師象口出必無之理不知所謂牛馬象師者皆山

之形似也其云入東南西北海則誤矣阿耨達山今之

岡底斯也岡底斯之前有二湖

番名馬品母達
賴湖郎噶湖

即阿耨

達池也其東有山曰馬口

番名打母
朱喀巴珀

有水流東南入

雲南境為檳榔江逕緬甸入南海其南有山曰象口

番名

郎千喀
巴珀有水流出入二湖而西流其北有山曰師子口

番名喀巴珀僧格有水流亦西行與象口之水會而南流其

西有山曰孔雀口番名馬珀家喀巴珀有水流南行與象師口

之水會而東南流為恒河番名岡噶母倫江入南海是經所謂

牛馬師象口者方位或不同至今番人猶稱名之特四

水一分流於東為檳榔江三合流於南為恒河而總入

於南海無分入四海之道耳酈道元水經注引西域記

云阿耨達山有水名遙奴名薩罕名恒伽三水俱入恒

河茲說信然又括地志謂阿耨達山一名崑崙者非也

崑崙去岡底斯西二十度在天竺之極西西印度之北
以北極為天頂故河圖括地象曰崑崙橫為地軸上為
天鎮道經謂天之中嶽水經謂崑崙在地之中皆言在
天地之中也岡底斯去北極偏東二十度其非崑崙明
矣

浮白

浮白二字人但知為飲罰爵之名不知浮白乃人身氣
穴之一素問黃帝問氣穴篇曰目瞳子浮白二穴注云

浮白在耳後入髮際足太陽少陽二脉之會特以古人
未經用過而素問為醫藥之書學者未能旁通故知者
鮮耳若玉樓銀海經蘓軾詩中引用後人皆知玉樓為
肩銀海為目矣

御稻米

豐澤園中有水田數區布玉田穀種歲至九月始刈穫
登場一日循行阡陌時方六月下旬穀穗方穎忽見一
科高出衆稻之上實已堅好因收藏其種待來年驗其

成熟之早否明歲六月時此種果先熟從此生生不已
歲取千百四十餘年以來內膳所進皆此米也其米色
微紅而粒長氣香而味腴以其生自苑田故名御稻米
一歲兩種亦能成兩熟口外種稻至白露以後數天不能
成熟惟此種可以白露前收割故山莊稻田所收每歲
避暑用之尚有贏餘曾頒給其種與江浙督撫織造令
民間種之聞兩省頗有此米惜未廣也南方氣暖其熟
必早於北地當夏秋之交麥禾不接得此早稻利民非

小若更一歲兩種則畝有倍石之收將來蓋藏漸可充實矣昔宋仁宗聞占城有早熟稻遣使由福建而往以珍物易其禾種給江淮兩浙即今南方所謂黑穀米也粒細而性硬又結實甚稀故種者絕少今御稻不待遠求生於禁苑與古之雀銜天雨者無異朕每飯時嘗願與天下羣黎共此嘉穀也

食氣

熊於山中必有跼伏之所大抵在巖洞之間人謂之熊

館至冬時入蟄呵氣成冰封其穴口僅留一小孔靜伏
於內至春乃出毛詩名物解云熊能引氣故冬蟄不食
昔年曾獵得蟄熊驗視腸胃淨潔無物知不食之言信
矣倘獵者不即斃之窟中熊逸而去則雖冬月亦必搏
獸而食以此悟道家習靜之士能危坐兩三日不食不
饑者即食氣內息之道也若與人應對酬酢便不耐饑
餓此無他氣隨音而動動則外洩內虛也張紫陽云氣
全則生存華佗五禽之戲本於莊周吹呴呼吸吐故納

新熊經鳥伸導引養形之術各有所由來矣

鳥舌

凡鳥舌皆附著下喙有短如粒者有及喙之半者有長與味齊者其短者聲濁而促稍長者聲亦轉長與味齊者其聲圓轉流麗鳴亦能久如黃鸝百舌畫眉阿鷓之屬是也其舌之似人者如鸚鵡了哥松鴉即可委曲其聲以像人語鸛鵒舌似人而有歧故必翦去之而後可學人言然率皆不過數語而止淮南子所謂鸚鵡能言

而不可使長言者得其所言而不得其所以言也此諸
鳥舌皆根於喉而藏於味唯啄木之舌其根通於腦後
其尖逾引逾伸長出於味寸餘樹中蟲蠹雖潛藏穴隙
皆伸其舌鉤取之又有一種蛇頭鳥其頸項甚長其舌
亦如啄木每為鷹鷂擊擒輒伸其舌以刺鷹鷂負痛力
一少縱則逸而逝矣此能以舌為用而不能鳴者以其
舌之太長也元命苞曰舌為言之達人之舌短者言澁
舌長者音不正理亦如是

地中有火

嘗閱陸游老學庵筆記云南鄭見一軍校火山軍人也言火山之南鋤鑿所及烈焰應手涌出故以火山名軍後人疑宋之火山軍為今岢嵐州地但有火山之名而無騰焰之事遂謂其說為妄不知此特地氣有變易耳今黑龍江及蒙古敖漢現有地中出火之處去土面一二寸炎光隨起接以引火之物輒傳焰而灼土人耕種時畧耘反之布種其上不兩三月即收穫矣蓋地氣極

熱發生最速故也先儒謂火行分寄於金木水土元命
苞曰火之為言委隨也謂隨物而具也朱子曰金木水
火體質屬土王達謂火實生土而土亦能生火山經所
載令邱騰火諸薄炎山事亦有之無足怪者地志云蜀
川火井隨處而發久者百年或數十年光焰廼息此又
火隨地氣而聚散之一徵也

禽鳥肫肚之別

螽海集云飛禽為陽皆食果穀走獸為陰皆食芻蕘此

言殆未盡然飛禽之中即有食生食穀之異其食生者則有肚如鶴鵠鷺鷥之類是也食穀者則有肫如鷺鴨雞雀之類是也集韻云肚胃也肫肚皆鳥之胃以所食而分故凡食生而兼食穀食穀而兼食生者其肫肚與專食穀食生者又各少別至於諸獸如牛羊鹿麋麇之胃則曰臍即肚之旁俗所謂百葉者周禮謂之脾析醢人注云脾析牛百葉也字說曰牛羊等物食生草故有百葉夫牛羊何嘗不食豆菽乎其百葉亦非因食生草

而有犬凡倒噍之獸皆有百葉爾雅曰牛曰齧羊曰齧麋鹿曰齧注云齧食之已久復出嚼之也反芻出嚼曰齧說文云齧者藏之糞中吐而噍也是牛羊麋鹿皆倒噍故有百葉以類推之可知矣又如熊羆之屬則兼食生物蔬菜猿猴之屬則專食果穀虎豹之屬則非生物不食走獸未嘗不食果穀而亦豈皆食芻藁乎昔人謂鳥獸得氣之偏五臟六腑不能備具辨之甚詳而肥壯百葉之說獨未有發明之者見其粗而不知其精也惟

人於飲食亦有與臟腑不合者少沾氣味即噦吐反逆
終身不能入口此其腸胃之間亦必有異處靈樞經謂
五臟有大小高下堅脆故飲食嗜好不齊信哉言也

賦

時和年豐慶祝賦 并序

朕誕辰免慶賀行禮者亦多年矣近因六旬羣臣固請
又有恩綸故勉從衆意前一日進宮受賀頒詔往返二
日各省慶祝萬壽設壇誦經不止億兆朕握樞臨極章

句之能素不為務但自幼齡讀書屬文每覽大儒雖不以華麗為尚亦間有作者似取吟詠以托性情因而有感用時和年豐慶祝賦七字為韻賦曰

幸昇平之泰運歷歲月之良時季春移序而大端化俗淑氣氤氲而諸政無為恐德弗類乾惕是規求賢每形乎寤寐治體未致夫昌期同心翊贊是賴多士恭已臨軒憑茲九司主屏虛諛而啓千秋不拔之業臣去私饋而建百世無窮之基此前聖之至理後人所未思也爾

迺揚鑾青野設輦鳴珂太昊斯啓大樂在和衡塗峻闢
雲殿義路廣宣偈歌新花受雨露以爭艷春鳥應載陽
而舞多衆芳芬鬱麗景遮那都人士女轂擊肩摩遠近
縫掖重登制科於是音發簫鼓聲雜管絃百戲盈阡陌
以鬪勝羣黎集岐路而爭先勿驚勿動而民偃如草不
震不騰而朝宗若川結綵綰紛惜傷物力之勞費鋪筵
絡繹止禁珍饈之競妍去奢崇儉力穡祈年此帝王所
當知其然也又迺駢羅羽衛杳渺仙宮金莖玉露福地

空伺論芝田之可種拂珠樹而還童服氣鍊精暖碧臺
之錯落守神凝思叅紫府之穹崇此皆耗精氣於虛廓
廢政事之全功凜黷祀弗欽之旨戒思元蕩志之風若
夫徧列傳燈廣懸法鏡期衆善之並臻冀靈祇之協慶
布德延福仰慈蔭於慧雲妙覺能仁渡寶筏於西聖香
風普拂花宮真印潛孚斗柄詳考影形之實恐遺有漏
之行於是明三綱斂五福法天地之無私叶神人之秘
祝養老尊賢重農貴粟含生欣欣長世樸樸祈萬寶之

順成望彼蒼之戩穀願永永其若茲凝休徵於第祿原
夫泰運升恒乾元下濟謙尊有終恒久勿替先稼穡之
惟艱惠鰥寡之是務陽順叙而不愆陰應期以相附沛
甘澍以咸周扇和風而廣布聞善言於詩書乃予懷之
所慕寫冀望之孔殷爰抽毫而作賦

聖祖仁皇帝御製文第四集卷三十一